

13 SEP 1998

Komanwel-Boling Tenpin (Lelaki)

EMAS PERTAMA MALAYSIA DARI KENNY, BEN DALAM BOLING

KUALA LUMPUR, 13 Sept (Bernama) -- Malaysia memenangi emas pertamanya dalam Sukan Komanwel ke 16 hari ini menerusi Kenny Ang dan Ben Heng dalam bahagian regu lelaki acara boling tenpin di Pyramid Bowl hari ini.

Kenny dan Ben mencatat 3,552 jatuhan pin bagi menewaskan Antoine Jones dan Conrad Lister dari Bermuda dengan 223 jatuhan pin manakala pasangan Australia Michael Muir dan Francis Ryan menduduki tempat ketiga dengan 3,229 jatuhan pin.

Pagi tadi, pasangan wanita Malaysia Lai Kin Ngoh dan Shalin Zulkifli meraih pingat perak setelah tewas kepada regu Australia Cara Honeychurch dan Maxim Nable.

Kenny, 45, dan Ben, 24, mendahului 14 regu lain dari awal-awal lagi. Kehadiran Perdana Menteri Datuk Seri Dr Mahathir Mohamad pada pertengahan pertandingan menyuntik semangat kepada pasangan negara yang selesa dengan kelebihan 278 pin sebelum permainan terakhir.

Kenny bermula dengan 235 tetapi Ben mencipta jatuhan tertinggi dengan 268 bagi jumlah 503 untuk mendahului Wayne Greenall dan Richard Hood dari England dengan 32 pin.

Mereka meluaskan jurang dengan England kepada 102 selepas games kedua yang menyaksikan Australia mengambil alih tempat kedua, 78 pin di belakang Malaysia.

Pada games keempat, Kenny dan Ang mendahului dengan 111 pin, diikuti 197 pin selepas games kelima, disusuli 176 dan 278. Apabila kedudukan di tempat kedua bertukar lagi, kemenangan sudah nyata bagi pasangan negara dan tepat pada 5.58 petang, emas Malaysia yang pertama disahkan.

Kenny mencatat 235, 222, 158, 237, 245, 198, 258 dan 194 bagi mencipta purata 218.38, yang kedua terbaik hari ini.

"Regu saya bermain cemerlang hari ini, dan selepas permainan ketujuh, saya yakin menang kerana kami mencipta jurang yang besar," kata Kenny, pemain nombor satu negara.

Ben menarik perhatian penonton dengan permainan konsisten dan mencatat 268, 224, 235, 203, 210, 226, 232 dan 207 bagi purata 225.63.

"Kita (Malaysia) telah mencapai sasaran dua pingat (dalam boling), dan jika kita menang lagi selepas ini, ia satu bonus. Emas ini sungguh bermakna bagi saya," kata Ben, naib juara Piala Masters Malaysia tahun ini.

Beliau menjangka pertandingan seterusnya lebih mencabar kerana pemain lain kini sudah tahu mengenai keadaan lorong.

Jones dan Lister juga mencipta nama sebagai pemenang pertama pingat Sukan Komanwel bagi Bermuda.

-- BERNAMA

HRS MAI